



O'ZBEKISTON RESPUBLIKASI
ADLIYA VAZIRLIGIDA
DAVLAT RO'YXATIDAN O'TKAZILDI
RO'YXAT RAQAMI: 3930
2026 - yil 24 - Avgust

O'ZBEKISTON RESPUBLIKASI MARKAZIY BANKI BOSHQARUVINING QARORI

O'zbekiston Respublikasi Markaziy bankining Tezkor to'lovlar tizimi orqali jismoniy shaxslar o'rtasida mobil telefon raqami asosida pul o'tkazmalarini amalga oshirish qoidalarini tasdiqlash haqida

O'zbekiston Respublikasining "O'zbekiston Respublikasining Markaziy banki [to'g'risida](#)"gi hamda "To'lovlar va to'lov tizimlari [to'g'risida](#)"gi qonunlari hamda O'zbekiston Respublikasi Prezidentining 2025-yil 27-noyabrdagi PQ-359-son "O'zbekistonda moliyaviy texnologiyalar sohasini yanada rivojlantirish chora-tadbirlari to'g'risida"gi [qaroriga](#) muvofiq O'zbekiston Respublikasi Markaziy banki boshqaruvi qaror qiladi:

1. O'zbekiston Respublikasi Markaziy bankining Tezkor to'lovlar tizimi orqali jismoniy shaxslar o'rtasida mobil telefon raqami asosida pul o'tkazmalarini amalga oshirish qoidalarini ilovaga muvofiq tasdiqlansin.

2. Mazkur qaror rasmiy e'lon qilingan kundan e'tiboran uch oy o'tgach kuchga kiradi.

O'zbekiston Respublikasi
Markaziy banki Raisi
14-Avgust 2026-yil
22/6 son



ISHMETOV TIMUR
AMINDJANOVICH

O'zbekiston Respublikasi
Markaziy banki boshqaruvining
2026-yil 14-avgustdagi
22/6-son qaroriga
ILOVA

**O'zbekiston Respublikasi Markaziy bankining Tezkor to'lovlar tizimi orqali
jismoniy shaxslar o'rtasida mobil telefon raqami asosida pul o'tkazmalarini
amalga oshirish
QOIDALARI**

Mazkur Qoidalar O'zbekiston Respublikasi Markaziy bankining Tezkor to'lovlar tizimi (bundan buyon matnda Tezkor to'lovlar tizimi deb yuritiladi) orqali jismoniy shaxslar o'rtasida mobil telefon raqami asosida ularning bank hisobvaraqlaridan to'g'ridan-to'g'ri pul o'tkazmalarini amalga oshirish tartibini belgilaydi.

1-bob. Umumiy qoidalar

1. Ushbu Qoidalarda quyidagi asosiy tushunchalar qo'llaniladi:

oluvchining bank hisobvarag'i – bank tomonidan shartnomaga muvofiq jismoniy shaxsga 22616 Jismoniy shaxslarning bank hisobvaraqlaridagi masofadan turib xizmat ko'rsatish tizimi orqali boshqariladigan mablag'lari hisobvarag'ida ochiladigan va uning mobil telefon raqami biriktiriladigan bank hisobvarag'i;

bog'lash – Bank depozitorlarining milliy axborotlar bazasida (bundan buyon matnda BDMAB) bank hisobvarag'iga jismoniy shaxsning mobil telefon raqamini biriktirish;

“bog'lash kodi” – bank hisobvarag'iga jismoniy shaxsning mobil telefon raqamini biriktirish to'g'risidagi so'rovga javoban BDMABdan qaytariladigan maxsus kod;

Ro'yxat – terrorizmga, ommaviy qirg'in qurolini tarqatishga qarshi kurashishni amalga oshiruvchi davlat organlari va O'zbekiston Respublikasining boshqa vakolatli organlaridan taqdim etilayotgan ma'lumotlar, shuningdek, chet davlatlarning vakolatli organlari va xalqaro tashkilotlaridan rasmiy kanallar orqali taqdim etilayotgan ma'lumotlar asosida O'zbekiston Respublikasi Bosh prokuraturasi huzuridagi Iqtisodiy jinoyatlarga qarshi kurashish departamenti tomonidan tuzilgan terrorchilik faoliyatida yoki ommaviy qirg'in qurolini

tarqatishda ishtirok etayotgan yoki ishtirok etishda gumon qilinayotgan shaxslar ro'yxati;

o'tkazma – to'lovchi tomonidan BDMABda mobil telefon raqami bog'langan bank hisobvarag'iga pul o'tkazmalarini amalga oshirish;

tashabbuskor bank – bank hisobvarag'idagi mablag' hisobidan pul o'tkazmalarini amalga oshiruvchi jismoniy shaxsga xizmat ko'rsatuvchi bank;

benefitsiar bank – bank hisobvarag'iga pul o'tkazmalarini qabul qiluvchi jismoniy shaxsga xizmat ko'rsatuvchi bank;

mobil telefon raqami – O'zbekiston Respublikasida faoliyat yurituvchi mobil aloqa operatorlari tomonidan xizmat ko'rsatiladigan mobil aloqa abonent raqami;

to'lovchi – jismoniy shaxsning BDMABda mobil telefon raqami biriktirilgan bank hisobvarag'iga pul o'tkazmalarini amalga oshiruvchi jismoniy shaxs;

oluvchi – BDMABda mobil telefon raqami biriktirilgan bank hisobvarag'iga pul o'tkazmalarini qabul qiluvchi jismoniy shaxs.

2. Tezkor to'lovlar tizimi orqali jismoniy shaxslar o'rtasida mobil telefon raqami asosida ularning bank hisobvaraqlaridan to'g'ridan to'g'ri o'tkazmalarni amalga oshirishda Kredit va to'lov tashkilotlari, to'lov tizimi operatorlari tomonidan jismoniy shaxslarga masofadan moliyaviy xizmatlar ko'rsatishda axborot xavfsizligi va kiberxavfsizlikni ta'minlash hamda frod holatlarining oldini olish bo'yicha minimal talablar to'g'risidagi [nizom](#) (ro'yxat raqami 3759, 2026-yil 21-yanvar) talablariga rioya etilishi lozim.

3. Jismoniy shaxslar o'rtasida mobil telefon raqami asosida o'tkazmalarni amalga oshirish bilan bog'liq barcha jarayonlar avtomatik ravishda real vaqt rejimida amalga oshiriladi.

2-bob. Mobil telefon raqamini bank hisobvarag'iga bog'lash va uni bekor qilish

4. Bankning mobil ilovasida ro'yxatdan o'tgan foydalanuvchining (bundan buyon matnda foydalanuvchi deb yuritiladi) mobil telefon raqamini uning bank hisobvarag'iga bog'lash bank va foydalanuvchi o'rtasidagi bank hisobvarag'iga mobil telefon raqamini bog'lash to'g'risidagi oferta shartnomasiga asosan amalga oshiriladi.

Bank hisobvarag'iga mobil telefon raqamini bog'lash to'g'risidagi oferta shartnomasida foydalanuvchining ismi, familiyasi va otasining ismi, jismoniy shaxsning shaxsiy identifikatsiya raqami, mobil telefon raqami bog'langan bank

nomi va uning rekvizitlari, shuningdek, ushbu bankdagi mobil telefon raqami bog‘langan bank hisobvaraqlarining rekvizitlari kabi shaxsga doir ma’lumotlardan foydalanishga roziligi nazarda tutilishi lozim.

Oferta shartnomasining matni foydalanuvchilar uchun tushunarli, aniq va sodda shaklda bayon etilishi lozim.

5. Bank tomonidan foydalanuvchining bank mobil ilovasida ro‘yxatdan o‘tgan mobil telefon raqami avtomatik ravishda BDMABga real vaqt rejimida uzatiladi.

6. Foydalanuvchi bir bank doirasida mobil telefon raqamini o‘zining faqat bitta bank hisobvarag‘iga bog‘lashiga ruxsat etiladi.

7. BDMAB bog‘lash jarayoni yakunlangach, bankka avtomatik ravishda real vaqt rejimida “bog‘lash kodi”ni yuboradi va ushbu “bog‘lash kodi” foydalanuvchining bank mobil ilovasida ko‘rsatiladi.

Bunda foydalanuvchi tomonidan “bog‘lash kodi” qabul qilingan vaqtdan boshlab uning mobil telefon raqami bank hisobvarag‘iga bog‘langan hisoblanadi.

8. Foydalanuvchi bankning mobil ilovasida yangi mobil telefon raqamini ro‘yxatdan o‘tkazgan taqdirda, bank tomonidan mazkur foydalanuvchining avvalgi bank hisobvarag‘iga bog‘langan mobil telefon raqami avtomatik ravishda yangi ro‘yxatdan o‘tkazilgan mobil telefon raqamiga o‘zgartiriladi.

9. Foydalanuvchi istalgan vaqtda bankning mobil ilovasi orqali yoki bankka bevosita murojaat qilgan holda shu bankdagi bank hisobvarag‘iga mobil telefon raqamini bog‘lash amaliyotini bekor qilishi mumkin.

Bunda foydalanuvchining mobil telefon raqamini bank hisobvarag‘iga bog‘lash bo‘yicha bank va foydalanuvchi o‘rtasida tuzilgan oferta shartnomasi belgilangan tartibda bekor qilingan hisoblanadi.

10. Foydalanuvchining bank hisobvarag‘iga mobil telefon raqamini bog‘lash quyidagi hollarda bank tomonidan mijozning roziligisiz (topshirig‘isiz) bekor qilinishi mumkin:

foydalanuvchining bank mobil ilovasidagi hisobga olish yozuvi (akkaunti) o‘chirilganda;

foydalanuvchi Ro‘yxatdagi shaxs ekanligi aniqlanganda.

Bunda bank tomonidan mobil telefon raqamini bog‘lash bekor qilingan kundan keyingi bank ish kunidan kechiktirmasdan foydalanuvchiga bank hisobvarag‘iga mobil telefon raqamini bog‘lash amaliyoti bekor qilinganligi sababi va murojaat qilishi mumkin bo‘lgan bankning telefon raqamlari ko‘rsatilgan holda xabar beriladi.

3-bob. O'tkazmalarni amalga oshirish

11. O'tkazma to'lovchining bank mobil ilovasi orqali yoki bevosita bankka taqdim etiladigan topshirig'i asosida amalga oshiriladi.

O'tkazmani amalga oshirishda to'lovchining bank hisobvarag'idagi pul mablag'i oluvchining bank hisobvarag'iga o'tkaziladi.

12. O'tkazmalar bankning mobil ilovasi orqali o'tkazilganda, mazkur Qoidalarining ilovasida keltirilgan Tezkor to'lovlar tizimi orqali jismoniy shaxslar o'rtasida mobil telefon raqami asosida o'tkazmalarni amalga oshirish bilan bog'liq jarayonlar sxemasi bo'yicha uzluksiz 24/7 rejimida amalga oshiriladi.

Bankka bevosita murojaat qilish orqali amalga oshiriladigan o'tkazmalar bankning ish kunlari va ish vaqtiga muvofiq amalga oshiriladi.

13. O'tkazma amalga oshirilishidan oldin to'lov summasi, oluvchining familiyasi, ismi va otasining ismi, benefitsiar bank nomi hamda to'lov xizmatlari ko'rsatganlik uchun vositachilik haqi to'g'risidagi ma'lumot to'lovchiga ko'rsatilishi va u tomonidan yakuniy tasdiqlash Kredit va to'lov tashkilotlari, to'lov tizimi operatorlari tomonidan jismoniy shaxslarga masofadan moliyaviy xizmatlar ko'rsatishda axborot xavfsizligi va kiberxavfsizlikni ta'minlash hamda frod holatlarining oldini olish bo'yicha minimal talablar to'g'risidagi [nizomga](#) (ro'yxat raqami 3759, 2026-yil 21-yanvar) asosan amalga oshirilishi lozim.

14. O'tkazmani amalga oshirish jarayonida banklar va Tezkor to'lovlar tizimi o'rtasidagi ma'lumot almashinuvi Tezkor to'lovlar tizimi ishtirokchilari o'rtasida ma'lumot almashinuvi bo'yicha texnologik yo'riqnomaga (bundan buyon matnda Tezkor to'lovlar tizimining texnik hujjati deb yuritiladi) asosan amalga oshiriladi.

Bunda tashabbuskor bank tomonidan to'lov hujjatidagi tegishli maydonga to'lovchining xos raqami bilan ochilgan bank hisobvarag'i, uning shaxsiy identifikatsiya raqami, familiyasi, ismi va otasining ismi to'liqligicha Tezkor to'lovlar tizimiga yuboriladi.

15. To'lovchi tomonidan taqdim etilgan oluvchining mobil telefon raqami yoki "bog'lash kodi" asosida tashabbuskor bank Tezkor to'lovlar tizimiga identifikatsiya so'rovini yuboradi.

16. Tezkor to'lovlar tizimi tashabbuskor bankdan kelgan identifikatsiya so'rovida ko'rsatilgan "bog'lash kodi" yoki telefon raqami asosida oluvchining bank hisobvaraqlari ro'yxatini olish uchun BDMABga so'rov yuboradi.

17. BDMABdan olingan ma'lumotlar asosida Tezkor to'lovlar tizimi o'tkazmalarni oluvchining familiyasi, ismi va otasining ismi hamda uning bank hisobvarag'i ochilgan banklar to'g'risidagi ma'lumotlarini tashabbuskor bankka yuboradi.

18. To'lovchi bankning mobil ilovasi orqali yoki bevosita bankka murojaat qilganda, unga tashabbuskor bank xodimi tomonidan mazkur Qoidalarining 17-bandidagi ma'lumotlar taqdim qilinadi. To'lovchi tomonidan ushbu ma'lumotlar asosida o'tkazma amalga oshiriladigan benefitsiar bank tanlanadi.

19. Tashabbuskor bank to'lovchi tanlagan benefitsiar bankdagi oluvchining bank rekvizitlarini olish uchun Tezkor to'lovlar tizimiga so'rov yuboradi.

20. Tezkor to'lovlar tizimi orqali taqdim etilgan oluvchining bank rekvizitlari asosida hamda Tezkor to'lovlar tizimining texnik hujjatida belgilangan ma'lumotlarni kiritgan holda tashabbuskor bank to'lov hujjatini shakllantiradi va Tezkor to'lovlar tizimiga yuboradi.

21. Tezkor to'lovlar tizimi tomonidan to'lov hujjati benefitsiar bankka tasdiqlash uchun yuboriladi.

Benefitsiar bank tomonidan to'lov hujjatini qabul qilish tasdiqlangandan so'ng, Tezkor to'lovlar tizimi tomonidan o'tkazma amalga oshiriladi.

22. To'lovchi va oluvchi o'rtasidagi o'tkazmalar bir bank doirasida amalga oshirilsa, o'tkazmalarni Tezkor to'lovlar tizimi orqali amalga oshirish talab etilmaydi.

23. Tashabbuskor va benefitsiar bank o'tkazmalarni amalga oshirishda Tijorat banklarida jinoiy faoliyatdan olingan daromadlarni legallashtirishga, terrorizmni moliyalashtirishga va ommaviy qirg'in qurolini tarqatishni moliyalashtirishga qarshi kurashish bo'yicha ichki nazorat [qoidalari](#) (ro'yxat raqami 2886, 2017-yil 23-may) talablariga amal qilishi lozim.

24. O'tkazma muvaffaqiyatli amalga oshirilganda, bu haqida to'lovchiga quyidagi rekvizitlarni o'z ichiga oladigan to'lov xizmati ko'rsatilganligini tasdiqlovchi hujjat taqdim etiladi:

- o'tkazma amalga oshirilgan sana va vaqt;
- o'tkazma amalga oshirilgan to'lov tizimining nomi;
- o'tkazmaning to'lov tizimidagi xos raqami (BID);
- tashabbuskor bank kodi va nomi;
- to'lovchining bank hisobvarag'i;
- to'lovchining ismi, familiyasi va otasini ismi;
- o'tkazma va vositachilik haqi summasi;
- o'tkazma maqsadi (agar ko'rsatilsa);
- benefitsiar bank kodi va nomi;
- oluvchining bank hisobvarag'i;
- oluvchining ismi, familiyasi va otasini ismi;
- oluvchining telefon raqami yoki "bog'lash kodi".

25. Oluvchining bank hisobvarag'iga o'tkazilgan o'tkazmalar oluvchi tomonidan cheklovlersiz tasarruf etilishi banklar tomonidan ta'minlanishi lozim.

4-bob. Banklarda hisob-kitoblarni tashkil qilish

26. Tezkor to'lovlar tizimi orqali amalga oshirilgan o'tkazma asosida tashabbuskor bank (A bank) tomonidan buxgalteriya hisobi yozuvi quyidagicha aks ettiriladi:

a) filialga ega bo'lgan tashabbuskor bankda:

1) debet 20206 Jismoniy shaxslarning talab qilib olinguncha saqlanadigan depozitlari – A bank filiali;

debet 22616 Jismoniy shaxslarning bank hisobvaraqlaridagi masofadan turib xizmat ko'rsatish tizimi orqali boshqariladigan mablag'lari – A bank filiali;

debet 22617 Pensionerlarning bank kartalari bo'yicha majburiyatlar – A bank filiali;

debet 22618 Jismoniy shaxslarning bank kartalari bo'yicha majburiyatlari – A bank filiali;

kredit 22224 Bosh ofis/filiallarga Tezkor to'lovlar tizimida hisob-kitoblar bo'yicha to'lanadigan mablag'lar – A bank filiali;

2) debet 22224 Bosh ofis/filiallarga Tezkor to'lovlar tizimida hisob-kitoblar bo'yicha to'lanadigan mablag'lar – A bank filiali;

kredit 16123 Bosh ofis/filiallardan Tezkor to'lovlar tizimida hisob-kitoblar bo'yicha olinadigan mablag'lar – A bank bosh ofisi;

3) debet 16123 Bosh ofis/filiallardan Tezkor to'lovlar tizimida hisob-kitoblar bo'yicha olinadigan mablag'lar – A bank bosh ofisi;

kredit 20814 Markaziy bankka to'lanishi lozim bo'lgan mablag'lar – Tezkor to'lovlar tizimi – A bank bosh ofisi;

4) debet 20814 Markaziy bankka to'lanishi lozim bo'lgan mablag'lar – Tezkor to'lovlar tizimi – A bank bosh ofisi;

kredit 17480 Markaziy bankning Kliring tizimi bo'yicha tijorat banklaridan olinadigan mablag'lar – Markaziy bank;

b) filialga ega bo'lmagan tashabbuskor bankda:

1) debet 20206 Jismoniy shaxslarning talab qilib olinguncha saqlanadigan depozitlari – A bank;

debet 22616 Jismoniy shaxslarning bank hisobvaraqlaridagi masofadan turib xizmat ko'rsatish tizimi orqali boshqariladigan mablag'lari – A bank;

debet 22617 Pensionerlarning bank kartalari bo'yicha majburiyatlar – A bank;
debet 22618 Jismoniy shaxslarning bank kartalari bo'yicha majburiyatlari – A bank;

kredit 20814 Markaziy bankka to'lanishi lozim bo'lgan mablag'lar – Tezkor to'lovlar tizimi – A bank;

2) debet 20814 Markaziy bankka to'lanishi lozim bo'lgan mablag'lar – Tezkor to'lovlar tizimi – A bank;

kredit 17480 Markaziy bankning Kliring tizimi bo'yicha tijorat banklaridan olinadigan mablag'lar – Markaziy bank.

27. Tezkor to'lovlar tizimi orqali amalga oshirilgan o'tkazma asosida benefitsiar bank (B bank) tomonidan buxgalteriya hisobi yozuvi quyidagicha aks ettiriladi:

a) filialga ega bo'lgan benefitsiar bankda:

1) debet 10313 Markaziy bankdan olinishi lozim bo'lgan mablag'lar — Tezkor to'lovlar tizimi – B bank bosh ofisi;

kredit 22224 Bosh ofis/filiallarga Tezkor to'lovlar tizimida hisob-kitoblar bo'yicha to'lanadigan mablag'lar – B bank bosh ofisi;

2) debet 22224 Bosh ofis/filiallarga Tezkor to'lovlar tizimida hisob-kitoblar bo'yicha to'lanadigan mablag'lar – B bank bosh ofisi;

kredit 16123 Bosh ofis/filiallardan Tezkor to'lovlar tizimida hisob-kitoblar bo'yicha olinadigan mablag'lar – B bank filiali;

3) debet 16123 Bosh ofis/filiallardan Tezkor to'lovlar tizimida hisob-kitoblar bo'yicha olinadigan mablag'lar – B bank filiali;

kredit 22616 Jismoniy shaxslarning bank hisobvaraqlaridagi masofadan turib xizmat ko'rsatish tizimi orqali boshqariladigan mablag'lari – B bank filiali;

4) debet 27480 Markaziy bankning Kliring tizimi bo'yicha tijorat banklarga to'lanishi lozim bo'lgan mablag'lar – Markaziy bank;

kredit 10313 Markaziy bankdan olinishi lozim bo'lgan mablag'lar – Tezkor to'lovlar tizimi – B bank bosh ofisi;

b) filialga ega bo'lmagan benefitsiar bankda:

1) debet 10313 Markaziy bankdan olinishi lozim bo'lgan mablag'lar – Tezkor to'lovlar tizimi – B bank;

kredit 22616 Jismoniy shaxslarning bank hisobvaraqlaridagi masofadan turib xizmat ko'rsatish tizimi orqali boshqariladigan mablag'lari – B bank;

2) debet 27480 Markaziy bankning Kliring tizimi bo'yicha tijorat banklarga to'lanishi lozim bo'lgan mablag'lar – Markaziy bank;

kredit 10313 Markaziy bankdan olinishi lozim bo'lgan mablag'lar – Tezkor to'lovlar tizimi – B bank.

28. O'tkazma bir bank doirasida amalga oshirilsa, bank tomonidan buxgalteriya hisobi yozuvi quyidagicha aks ettiriladi:

debet 20206 Jismoniy shaxslarning talab qilib olinguncha saqlanadigan depozitlari;

debet 22616 Jismoniy shaxslarning bank hisobvaraqlaridagi masofadan turib xizmat ko'rsatish tizimi orqali boshqariladigan mablag'lari – to'lovchining bank hisobvarag'i;

debet 22617 Pensionerlarning bank kartalari bo'yicha majburiyatlar – to'lovchining bank hisobvarag'i;

debet 22618 Jismoniy shaxslarning bank kartalari bo'yicha majburiyatlari to'lovchining bank hisobvarag'i;

kredit 22616 Jismoniy shaxslarning bank hisobvaraqlaridagi masofadan turib xizmat ko'rsatish tizimi orqali boshqariladigan mablag'lari – oluvchining bank hisobvarag'i.

29. Amalga oshirilgan o'tkazmalar bo'yicha banklararo hisob-kitoblar Tezkor to'lovlar tizimi tomonidan kliring usuli asosida tashkil etiladi. Bunda majburiyatlar va talablarni o'zaro ayirish orqali tashabbuskor va benefitsiar banklarning sof pozitsiyasi aniqlanadi.

30. Bir operatsiya kuni davomida Tezkor to'lovlar tizimi tomonidan amalga oshiriladigan kliring jarayonlari soni va vaqti Markaziy bank tomonidan belgilanadi.

31. Joriy operatsiya kuni davomida yakunlanadigan kliring sessiyasida amalga oshirilgan o'tkazmalar ushbu operatsiya kuni sanasi bo'yicha buxgalteriya balansida aks ettiriladi.

Yakunlanish vaqti joriy operatsiya kuni tugaganidan keyingi operatsiya kuniga to'g'ri keladigan kliring sessiyasida amalga oshirilgan o'tkazmalar keyingi operatsiya kuni sanasi bo'yicha buxgalteriya balansida aks ettiriladi.

32. Yakuniy hisob-kitob tashabbuskor va benefitsiar banklarning sof pozitsiyalari natijalari bo'yicha shakllantiriladigan to'lov hujjatlari asosida tashabbuskor va benefitsiar banklarning vakillik hisobvaraqlari orqali amalga oshiriladi.

33. Yakuniy hisob-kitob natijasiga ko'ra, 10313 Markaziy bankdan olinishi lozim bo'lgan mablag'lar hisobvarag'ida passiv qoldiq yuzaga kelganda, buxgalteriya hisobi yozuvi benefitsiar bank xodimi tomonidan quyidagicha aks ettiriladi:

debet 10313 Markaziy bankdan olinishi lozim bo'lgan mablag'lar;

kredit 23206 Aniqlanish jarayonidagi tranzaksiyalar.

10313 Markaziy bankdan olinishi lozim bo'lgan mablag'lar hisobvarag'ida aktiv qoldiq yuzaga kelgan taqdirda, 10313 Markaziy bankdan olinishi lozim bo'lgan mablag'lar va 23206 Aniqlanish jarayonidagi tranzaksiyalar hisobvaraqlaridagi qoldiqlar o'zaro taqqoslanadi hamda ushbu hisobvaraqlardan qoldig'i eng kam bo'lgan summa miqdorida (23206 hisobvaraqdagi qoldiq nolga tenglashguncha) buxgalteriya hisobi yozuvi benefitsiar bank tomonidan quyidagicha aks ettiriladi:

debet 23206 Aniqlanish jarayonidagi tranzaksiyalar;

kredit 10313 Markaziy bankdan olinishi lozim bo'lgan mablag'lar.

Bunda 23206 Aniqlanish jarayonidagi tranzaksiyalar hisobvarag'i alohida tartib raqami bilan ochiladi.

34. Yakuniy hisob-kitob natijasiga ko'ra, 20814 Markaziy bankka to'lanishi lozim bo'lgan mablag'lar – Tezkor to'lovlar tizimi hisobvarag'ida aktiv qoldiq yuzaga kelganda, buxgalteriya hisobi yozuvi tashabbuskor bank xodimi tomonidan quyidagicha aks ettiriladi:

debet 17305 Aniqlanish jarayonidagi tranzaksiyalar;

kredit 20814 Markaziy bankka to'lanishi lozim bo'lgan mablag'lar – Tezkor to'lovlar tizimi.

20814 Markaziy bankka to'lanishi lozim bo'lgan mablag'lar – Tezkor to'lovlar tizimi hisobvarag'ida passiv qoldiq shakllanganda, 17305 Aniqlanish jarayonidagi tranzaksiyalar va 20814 Markaziy bankka to'lanishi lozim bo'lgan mablag'lar – Tezkor to'lovlar tizimi hisobvaraqlaridagi qoldiqlar o'zaro taqqoslanadi hamda ushbu hisobvaraqlardan qoldig'i eng kam bo'lgan summa miqdorida (17305 hisobvaraqdagi qoldiq nolga tenglashguncha) buxgalteriya hisobi yozuvi tashabbuskor bank tomonidan quyidagicha aks ettiriladi:

debet 20814 Markaziy bankka to'lanishi lozim bo'lgan mablag'lar – Tezkor to'lovlar tizimi;

kredit 17305 Aniqlanish jarayonidagi tranzaksiyalar.

Bunda 17305 Aniqlanish jarayonidagi tranzaksiyalar hisobvarag'i alohida tartib raqami bilan ochiladi.

35. Tashabbus va benefitsiar banklar mazkur Qoidalarining 33 va 34-bandlaridagi hisobvaraqlarda yuzaga kelgan passiv yoki aktiv qoldiqlar sababini aniqlash va oldini olish choralarini ko'rishi lozim.

5-bob. Yakuniy qoida

36. Mazkur Qoidalar talablarining buzilishida aybdor bo'lgan shaxslar qonunchilik hujjatlarida belgilangan tartibda javobgar bo'ladilar.

O'zbekiston Respublikasi Markaziy bankining Tezkor
to'lovlar tizimi orqali jismoniy shaxslar o'rtasida
mobil telefon raqami asosida pul o'tkazmalarini
amalga oshirish qoidalariga
ILOVA

**Tezkor to'lovlar tizimi orqali jismoniy shaxslar o'rtasida mobil telefon raqami asosida pul o'tkazmalarini amalga oshirish
bilan bog'liq jarayonlar
SXEMASI**

1-bosqich	2-bosqich	3-bosqich
To'lovchi bank mobil ilovasidagi tegishli maydonga oluvchining mobil telefon raqami yoki bog'lash kodini kiritadi	Tashabbuskor bank Tezkor to'lovlar tizimiga identifikatsiya so'rovini yuboradi	Tezkor to'lovlar tizimi Tashabbuskor bankdan yuborilgan identifikatsiya so'rovi asosida BDMABga oluvchining bank hisobvarag'i rekvizitlarini olish uchun so'rov yuboradi
4-bosqich	5-bosqich	6-bosqich
BDMAB Tezkor to'lovlar tizimi so'roviga javoban mobil telefon raqami bog'langan yoki bog'lash kodi taalluqli bo'lgan oluvchining bank hisobvarag'i (hisobvaraqlari) rekvizitlarini taqdim etadi	Tezkor to'lovlar tizimi BDMABdan olingan ma'lumotlar asosida oluvchining nomi va benefitsiar bank haqidagi ma'lumotlarni tashabbuskor bankka uzatadi	Tashabbuskor bank oluvchining nomi va benefitsiar bank haqidagi ma'lumotlarni to'lovchiga mobil ilova orqali taqdim etadi
7-bosqich	8-bosqich	9-bosqich
To'lovchi oluvchining nomi to'g'riligiga ishonch hosil qilgach, bank mobil ilovasida pul o'tkazmasi amalga oshiriladigan benefitsiar bankni tanlaydi	Tashabbuskor bank to'lovchining tanlovi asosida oluvchining bank hisobvarag'i rekvizitlarini Tezkor to'lovlar tizimidan olish uchun so'rov yuboradi va ma'lumotlarni qabul qilib oladi	Tashabbuskor bank oluvchining bank hisobvarag'i va to'lov hujjatining boshqa majburiy rekvizitlari kiritilgan to'lov hujjatini Tezkor to'lovlar tizimiga uzatadi va benefitsiar bank tomonidan tasdiqlanganidan so'ng to'lov amalga oshiriladi